

Saksbehandlar: Audun Erik Sunde, Nærings- og kulturavdelinga
Sak nr.: 15/10080-3

Omstilling innanfor petroleumssektoren - felles omstillingsarbeid på Sør- og Vestlandet

**Fylkesrådmannen rår hovudutval for næring og kultur til å gje slik tilråding:
Hovudutvalet rår fylkesutvalet til å gjere slikt vedtak:**

1. Sogn og Fjordane fylkeskommune sluttar seg til samarbeidet om felles omstillingsarbeid på Sør- og Vestlandet med Aust-Agder, Vest-Agder, Rogaland, Hordaland og Møre og Romsdal. Det er ein føresetnad at arbeidet skal organiserast med ei politisk styringsgruppe og administrativ prosjektgruppe.
2. Fylkesordførar representerer Sogn og Fjordane fylkeskommune i styringsgruppa med fylkesvaraordførar som vararepresentant. Det vert føresett at LO, NHO, NAV, IN og UH-sektoren vert invitert inn i styringsgruppa med kvar sin representant (for regionen under eitt).
3. Fylkesrådmannen vil peike ut administrativ representant frå Sogn og Fjordane til prosjektgruppa.

Vedlegg:

Andre dokument som ikkje ligg ved:

SAKSFRAMSTILLING

Innleiing

Den vanskelege situasjonen i petroleumssektoren har ført til svikt i aktivitet og lønsemd for leverandørbedriftene, noko som igjen har ført til at mange har blitt sagde opp og permitterte. For å møte utfordringane har Kommunal- og moderniseringsdepartementet (KMD) sett av 20 mill. kroner av dei regionale utviklingsmidlane i statsbudsjettet for 2016 (post 60) til omstilling. Midlane er øyremerkte omstillingsarbeid i dei seks fylka Aust-Agder, Vest-Agder, Rogaland, Hordaland, Sogn og Fjordane og Møre og Romsdal. Hordaland fylkeskommune har fått det overordna forvaltingsansvaret for verkemiddelbruken, men midlane skal nyttast på tvers av fylkesgrensene.

Det overordna målet for det regionale omstillingsarbeidet er å få til ein best mogleg samordna og koordinert innsats på tvers av fylkesgrensene for å kunne medverke til omstilling som følgje av utfordringane i olje- og gasssektoren.

Organisering

For å få på plass ei formålstenleg ansvars- og oppgåvedeling har dei seks involverte fylkeskommunane gjennomført ein relativt omfattande prosess. To alternative modellar for å organisere arbeidet har vore vurderte, ein vertsfylkeskommunemodell og ein prosjektmodell. Ut

frå ei samla vurdering er det semje om å tilrå at arbeidet blir organisert etter ein prosjektmodell med Hordaland fylkeskommune som prosjektansvarleg.

Styringsgruppa skal ha det overordna styrings- og koordineringsansvaret. I tillegg til ein representant frå kvar av fylkeskommunane, blir det foreslått at styringsgruppa skal ha representantar frå bransjen (utpeika av NHO og LO), frå IN, frå NAV og frå UH-sektoren. Styringsgruppa vil med dette få 11 medlemar.

Utgangspunktet er altså at arbeidet blir organisert som eit prosjekt med eiga styringsgruppe og Hordaland fylkeskommune som prosjekteigar. Som prosjekteigar skal Hordaland fylkeskommune m.a. sikre at dei seks fylkeskommunane har grunnlag for handsaming i eigen fylkeskommune gjennom godkjend prosjektforslag. Hordaland fylkeskommune skal også ta seg av overordna styring og kontroll av prosjektet. Andre oppgåver som vert tillagt prosjekteigar er:

- Tilbakemeldingar, framdriftsrapportar og styringssignal til styringsgruppa.
- Involvering, informasjon og koordinering av samarbeidet mellom dei seks fylka.

Den praktiske gjennomføringa av arbeidet vil i stor grad skje ute i dei aktuelle fylka. Kvar fylkeskommune må difor sette av tilstrekkelege ressursar, gjerne knytt til ein eller to medarbeidarar som til dagleg jobbar med omstilling og/eller bransjen. Desse personane vil utgjere den faglege og administrative ressursen i omstillingsarbeidet i eige fylke og må samarbeide tett i det praktiske arbeidet med tilsvarande personar i dei andre fylka og med prosjektleiinga.

Økonomi

For 2016 er den økonomiske ramma for omstillingsarbeidet dei 20 millionane som er løyvd over statsbudsjettet for 2016. Det er ikkje lagt til grunn at fylkeskommunane skal bidra med midlar utover dette.

Det er lagt til grunn at arbeidet kjem til å vare ved i fleire år. Basert på førebelse signal for KMD, er det lagt til grunn at arbeidet kan bli vidareført for 2017 og 2018 med den same organiseringa som er foreslått her. Ei vidareføring vil avhenge av tilsvarande statlege bidrag i 2017 og 2018.

I 2016 vil Hordaland fylkeskommune ta på seg oppgåva som vertsfylkeskommune/prosjektansvarleg utan økonomisk kompensasjon. Dersom arbeidsmengda blir stor og arbeidet vil gå over fleire år med nye løyvingar i 2017 og 2018, vil Hordaland fylkeskommune vurdere å be om at nokre av sekretariatskostnadane med å vere vertsfylkeskommune blir dekkja av den tildelte ramma, avgrensa til eitt årsverk.

Det blir elles lagt til grunn at kvar fylkeskommune sjølv dekkjer kostnadane til løn, reise mm. som deltakarfylkeskommune. Direkte utlegg knytt til styringsgruppa, til annonsering av midlane i fylka og andre direkte utlegg knytt til arbeidet vert dekkja av midlar frå ramma.

Innsatsområde

Omstillingsarbeidet har som formål å:

- Medverke til å realisere flest mogleg konkrete tiltak og prosjekt for å møte utfordringane i petroleumsindustrien i heile regionen.
- Legge til rette for effektiv og samordna verkemiddelbruk i kvart fylke, og på tvers av fylka.
- Gje grunnlag for felles innspel knytt til nasjonale rammevilkår på vegne av dei seks fylka som deltar.

I eit eige notat er dei overordna strategiske føringane og avgrensingane for verkemiddelbruken omtalt. Notatet er meint som eit grunnlag for vidare arbeid med dette i styringsgruppa. Det blir lagt til grunn at styringsgruppa kjem fram til ytterlegare spissing og prioritering av

verkemiddelbruken. Det blir også lagt til grunn at midlane skal nyttast i ei søknadsbasert ordning som delfinansiering av konkrete tiltak og prosjekt.

Det er peikt på følgjande strategiske hovudområde for verkemiddelbruken:

1. Støtte bedrifter som ønskjer å nytte kompetansen frå olje/gass til å utvikle nye produkt/tenester for andre sektorar/marknader.
2. Hjelp tilsette (og bedrifter) som ønskjer å nytte kompetanse og teknologi frå olje/gass sektoren til å starte nye bedrifter retta mot nye marknader.
3. Hjelp tilsette som ønskjer å styrke/komplettere kompetansen sin for å kunne gå inn i nye bransjar eller offentleg verksemd.
4. Etablering av nye leverandørbedrifter i olje- og gasssektoren.
5. Målretta innsats i område med mange arbeidsledige frå leverandørindustrien, lågterskeltilbod.
6. Støtte leverandørbedriftene med kompetanseressursar i val av utviklingsstrategi.

Avsluttande merknader

Ut frå grunnlagsarbeidet som vist til over, og påfølgjande politiske sonderingar (knytt til innstillingar og val i dei andre fylka), synest det no klart at det er ein slik modell, med politisk representasjon frå fylkeskommunane i styringsgruppa, det er semje om. I realiteten vert det difor lite relevant å vedta andre føresetnader. I praksis vert spørsmålet difor om Sogn og Fjordane ønskjer å være med eller ikkje. Fylkesrådmannen legg til grunn at vi ønskjer å delta og at samarbeid mellom fylka på dette feltet er verdifullt.